



Adbais po ol Parents

Parents i gad prapa impotant pat po sapot dem student wen dempla lern ol niu ting wea skul. Pipol i bin meke ol stadi ane dempla bin paindaut dat student i go lern mo ip parents blo dempla i sapot ediuksian blo dempla. Yupla no nid po gad plenti sabe blo English po elp ane sapot pikinini blo yupla wea da skul.

Elpe pikinini blo mi po lern English

Mipla prapa inkariz ol parents po sapot pikinini blo yu po lern English wase diskain:

- rid po pikinini blo yu wea langus blo yu ane wea English tu
- inkariz pikinini blo yu lern mo baut langus dempla yuzem wea aus ane po kip yuzem ebridei
- kip sabe mo baut da [Australian Curriculum](#) ane wanem pikinini blo yu i spostu lernem wea skul
- gede pikinini blo yu po tokbaut wanem dempla mekem wea skul
- tok wea dem tisa o sapot woka wea da skul ebritaim yu gad eni kuestin o wori baut dem skul program o wiskain progres pikinini blo yu i mekem
- go po dem parent tisa interview

Wen yu go bizit da skul, ip yu wande meke apointment po tok po dem tisa, go po da skul opis pas. Ip yu no sabe English prapa ane i moizi po tok wea langus blo yu, yu ken aske sam pamle o pren po go wea yu po da skul po elpe yu po tok wea dem skul tisa. O yu ken aske da skul po gede interpreta wea da [Translating ane Interpreting Serbis](#). Dis interpreta serbis i priwan.

Kip yuze langus blo yu

Bikoz yu da parent, i prapa impotant po kip yuze da langus yu ebritaim tok wea aus prant wea dem pikinini.

Da pas langus blo pikinini blo yu i prapa impotant pat blo uda dempla. Inkariz pikinini blo yu po kip lern mo baut dat pas langus blo dempla bikoz i go mekem moizi po tingking blo dempla wen dempla mub go po lern wea niu eria blo stadi.

Wen yu kip yuze da pas langus blo pikinini blo yu i go elpe dempla po sabe mo baut ebridei laip ane niu werd, solong

dempla no nid po weit til dempla sabe inap English po paindaut baut dem seim ting.

Pipol i bin meke plenti stadi ane dis stadi i soem dat skul pikinini uda gad gud sabe baut dempla oun langus i go lerne English mo kuik ane go meke plenti gud wok wea skul. Em i prapa ad po lerne nada langus ip da pikinini no prapa sabe da pas langus blo dempla ane i no gad sapot wen dem pikinini stat po lerne nada langus. Em i prapa impotant po dem parent po sapot dem pikinini po gad prapa gud sabe blo da pas langus blo dempla ip dempla go gede gud sabe ane skil wea English langus.

Elpe pikinini blo mi wen em go skul

Ip pikinini blo yu i stil lern po spik, rid ane rait wea English, den mipla kole dempla English as an additional language or dialect (EAL/D) learner ane dempla go gede ekstra sapot po elpe dempla wea lerning blo dempla.

Ebri student wea dem skul wea Australia go lern demting wea da [Australian Curriculum](#).

Bikoz pikinini blo yu i go lerne English da seimtaim dempla i go lerne ol nadating, dem tisa i go seinze da wei dempla tise demting po fit wea da sabe dem pikinini i gad wea English. Wen dempla sabe mo baut English da sapot dem pikinini i go gedem i go seinz tu.

Skul wok wea aus

Ebri skul i gad dipren aidia baut meke skul wok wea aus. Skul wok wea aus i go elpe da student po sapot da wok dempla mekem wen dempla stadi wea da skul. Ane i go elpe dempla po laik po kip stadi ane i go elp i dempla ken gede dem nada pipol wea da aus po bi pat blo da skul wok. Ip pikinini blo yu no sabe da skul wok em spostu mekem wea aus, i gud ip yu go ane tok po da tisa baut da wok.

Rid buk de wea aus i wan prapa gud wei po enzoi meke skul wok wea aus. Yu ken rid buk po pikinini blo yu, o yu ken sidaun longsaid wen dempla rid, o lete dempla rid demplaselp. Dem riding buk i ken bi wea English o wea da pas langus blo dem pikinini. Yu ken gede ol demwan prom skul library o prom kaunsil library.